

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZAVIDOVIĆI
Broj: 02-11-984/23-AP-2
Datum: 26.05.2023. godine



Na osnovu člana 15. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj: 49/06 i 51/09), člana 12. Privremene Statutame Odluke Grada Zavidovići („Službeni glasnik Općine Zavidovići", broj: 4/22), a u vezi sa članom 39. Statuta Općine Zavidovići („Službeni glasnik Općine Zavidovići", broj: 5/08, 5a/08 i 11/19), gradonačelnik donosi

ODLUKU

o postupku i uslovima osnivanja Savjetodavnog odbora građana Grada Zavidovići

I-OPĆE ODREDBE

Član 1.

U cilju ostvarivanja i unapređenja učešća građana u procesu planiranja, pokretanju inicijativa i davanju mišljenja u toku javnih konsultacija, predlaganju mjera za poboljšanje dostupnosti i kvaliteta javnih usluga kao i praćenju realizacije projekata od neposrednog interesa za građane na području jedinice lokalne samouprave, ovom Odlukom uređuje se osnivanje Savjetodavnog odbora građana, te se utvrđuje njegov djelokrug rada, nadležnost, broj članova, sastav, mandat, kao i postupak izbora.

Član 2.

Riječi i pojmovi koji imaju rodno značenje, bez obzira jesu li u odredbama ove Odluke korišteni u muškom ili ženskom rodu, odnose se na jednak način na muški i ženski rod.

II - SAVJETODAVNI ODBOR GRAĐANA

Član 3.

(1) Djelokrug rada Savjetodavnog odbora građana obuhvata sljedeće:

- (a) pružanje savjeta i podrške JLS u angažmanu građana u procesima lokalne uprave i identifikaciji novih prilika za učešće građana. U saradnji sa nadležnim predstavnicima JLS, Savjetodavni odbor građana će organizovati prilike za građane da na direktan ili indirektan način učestvuju u definisanju, planiranju i realizaciji potreba i prioriteta u oblastima koje se smatraju izuzetno značajnim za zajednicu, kao što su pružanje usluga, priprema budžeta, prostorno planiranje, prevencija korupcije, i sl.
- (b) učestvovanje u nadzoru i praćenju provedbe ključnih funkcija JLS (kao što su realizacija budžeta, provedba lokalnih strategija i akcionih planova, i sl.).
- (c) zagovaranje provedbe projekata i inicijativa koje su građani identificirali kao prioritetne. Pri tome, Savjetodavni odbor građana će podržati napore organizacija civilnog društva i ostalih lokalnih partnera da povećaju budžetsku pismenost, pitanje zagovaranja i sl.
- (d) pružanje pomoći JLS da povećaju svijest i unaprijede načine informisanja građana o njihovom radu, kako bi osigurali da informacije budu usmjerene i dostupne svim građanima, uključujući žene, mlade i marginalizirane grupe.

(2) Pored ovih ključnih oblasti djelovanja, Savjetodavni odbor građana, može poduzimati i ostale aktivnosti u dogovoru sa nadležnim predstavnicima JLS. Mandat Savjetodavnog odbora građana će biti utvrđen opisom specifičnih aktivnosti, koji će biti izrađen u toku uspostavljanja Savjetodavnog panela građana.

Član 4.

- (1) U obavljanju aktivnosti, Savjetodavni odbor građana će pratiti, predlagati, davati inicijative i preporuke, te učestvovati u postupcima donošenja odluka o pitanjima koja se odnosi na društveni i ekonomski razvoj zajednice.
- (2) Saradnja Savjetodavnog odbora građana sa nadležnim predstavnicima JLS realiziraće se putem jednomjesečnih sastanaka kojim će prisustvovati delegirani predstavnici JLS kao i tromjesečnim sastancima s gradonačelnikom, a po potrebi i sa predstavnicima Gradskog vijeća.
- (3) Savjetodavni odbor građana će pripremati kvartalni izvještaj koji se odnosi na aktivnosti koje su realizirane u tom kvartalu, uključujući preporuke koje budu imali za gradonačelnika i/ili predstavnike Gradskog vijeća. Kvartalni izvještaj će biti javno objavljen i dostavljen široj javnosti kako bi se povećala svijest o radu Savjetodavnog odbora građana.

Član 5.

- (1) Savjetodavni odbor građana će se sastojati od 6 do 10 članova, uključujući predsjedavajućeg i zamjenika predsjedavajućeg. Zainteresovane lokalne organizacije će predložiti kandidate koji će ispuniti polovinu raspoloživih mjesta u Savjetodavnom odboru građana, dok će preostalu

polovinu raspoloživih mjesta ispuniti građani koji predstavljaju lokalnu zajednicu bez organizacione pripadnosti.

- (2) Broj članova Savjetodavnog odbora građana može varirati u zavisnosti od spremnosti pojedinaca i predstavnika lokalnih organizacija iz člana 6. stav (1) ove Odluke da učestvuju.
- (3) Izbor članova Savjetodavnog odbora građana vrši se na temelju Javnog poziva, koji pokreće i provodi Služba za upravu privrede, lokalni razvoj, infrastrukturu i međunarodnu saradnju.
- (4) Služba za upravu privrede, lokalni razvoj, infrastrukturu i međunarodnu saradnju dužna je raspisati i objaviti Javni poziv za izbor i imenovanje članova Savjetodavnog odbora građana u roku od 3 dana, od dana donošenja ove Odluke.
- (5) Izbor članova Savjetodavnog odbora građana će se vršiti na temelju kriterija za odabir članova koji će se prezentirati građanima u Javnom pozivu.
- (6) U procesu izbora članova Savjetodavnog odbora građana vodit će se računa o ravnopravnoj zastupljenosti oba spola, učešću mladih, osoba starije životne dobi, kao i predstavnika marginaliziranih skupina.
- (7) Članovi Savjetodavnog odbora građana imenuju se na period od 12 mjeseci.
- (8) Predsjedavajućem, zamjeniku predsjedavajućeg i članovima Savjetodavnog odbora građana može prestati mandat prije njihovog isteka na lični zahtjev, ili ukoliko ne učestvuju aktivno i ukoliko odjave prebivalište sa područja jedinice lokalne samouprave.
- (9) Imenovanje članova Savjetodavnog odbora građana za naredni mandat izvršit će se raspisivanjem novog Javnog poziva, na način propisan ovim članom.

Član 6.

(1) Kandidate za članove Savjetodavnog odbora građana mogu predložiti:

- organizacije civilnog društva,
- javna preduzeća,
- javne institucije,
- privatni poslovni subjekti locirani u JLS,
- profesionalna udruženja (udruženje poslodavaca, privredne komore, i sl.),
- udruženja i fondacija koje u skladu sa svojim statutom provode aktivnosti usmjerene na žene, mlade i/ili marginalizovane kategorije,
- građani-aktivisti svih starosnih skupina.

(2) Prijave kandidata za članove Savjetodavnog odbora građana iz stava 1. ovog člana dostavljaju se Službi za upravu privrede, lokalni razvoj, infrastrukturu i međunarodnu saradnju u pisanoj formi. Prijava mora ispunjavati kriterije za izbor članova, i mora biti ovjerena od strane ovlaštene osobe predlagača.

(3) Prijedlog iz stava (2) ovog člana ne mora biti ovjerena ukoliko se radi o kandidatima koji pripadaju neformalnoj inicijativi građana i neformalnoj grupi i zainteresovanom pojedincu.

(4) Članovi Savjetodavnog odbora građana is stava 1. ovog člana moraju biti punoljetna lica, moraju imati prebivalište na području grada, i moraju biti neutralna - da nisu državni službenici na bilo kojem nivou vlasti, da nisu zaposleni u gradskoj upravi i da nisu članovi organa političke stranke.

(3) Kriteriji za izbor članova Savjetodavnog panela građana iz stava 1. ovog člana su:

- motiviranost da postanu članovi Savjetodavnog odbora građana,
- prethodno iskustvo u inicijativama/projektima u lokalnoj zajednici,
- čvrsta opredjeljenost da po potrebi izdvoje najmanje 10 sati mjesečno za volonterski rad tokom 12-mjesečnog mandata,
- želja da doprinesu pozitivnim promjenama u zajednici,
- drugi relevantni kriteriji.

Član 7.

- (1) Najstariji član Savjetodavnog odbora građana saziva konstituirajuću sjednicu na kojoj se vrši izbor predsjedavajućeg i zamjenika predsjedavajućeg.
- (2) Savjetodavni odbor građana donosi Poslovnik o radu kojim se uređuje organizacija, način rada, odlučivanja i izvještavanja u skladu sa odredbama člana 5. ove Odluke.
- (3) Administrativno-tehničke poslove za potrebe Savjetodavnog odbora građana obavlja Služba za upravu privrede, lokalni razvoj, infrastrukturu i međunarodnu saradnju Grada.

Član 8.

Članstvo u Savjetodavnom odboru građana je zasnovano isključivo na volonterskom radu i članovi Savjetodavnog odbora građana neće primati naknadu za rad u Odboru. Operativne troškove (kao što su kancelarijski pribor, osvježenje i sl.) može snositi Grad ukoliko je prethodno dogovoreno.

Član 9.

Članovi Savjetodavnog odbora građana u svom radu obavezni su postupiti tako da ne ugroze obavezu čuvanja službenih podataka i informacija koje su zaštićene Zakonom o zaštiti tajnih podataka i Zakonom o zaštiti ličnih podataka.

Član 10.

Odluka stupa na snagu danom donošenja i ista će se istaknuti na oglasnoj ploči i objaviti u Službenom glasniku Grada Zavidovići i web stanici Grada.



PO OVLASHTENJU GRADONAČELNIKA
broj:02-45-9/22-AP-41 od 22.04.2022 godine
SEKRETAR GRADSKOG ORGANA
DRŽAVNE SLUŽBE

Nermin Čahtarević, dipl.pravnik